



Ramazan je mjesec strpljenja, marljivosti i rada (Meka)

Hatib: dr. Bender ibn Abdulaziz Belile

16. ramazan 1444. god. po Hidžri / 07. april 2023.

Neka je svaka hvala Allahu Koji Svojim voljenim robovima daruje da osjete slast pokornosti, a sprečava ih da lutaju i vrijeme dangube. On im daruje da najbolja djela čine kako bi zaslužili najvredniju nagradu. Svjedočim zadovoljno i čvrsto ubijeđen srcem i umom da nema boga osim Allaha, Jedinoga. Svjedočim da je Muhammed Allahov poslanik, kojem je Uzvišeni darovao najviši stepen i prvi šefat. Neka su Božiji salavat i selam na njega, na njegovu časnu porodicu, vrle ashabe i sve sljedbenike do Sudnjeg dana.

Poštovani vjernici, savjetujem, vas i sebe, da budemo bogobojažni, da se Allaha bojimo i Njemu budemo pokorni. Budimo bogobojažni kako bi nam se Allah smilovao. Imajmo na umu da smo u blagoslovljenom vremenskom periodu, odabranom mjesecu. Sretan je onaj ko isposti njegove dane i svoj post ne ništi. Onaj ko noću dosljedno namaz obavlja, ko često skrušeno uči Kur'an, čuva svoje tijelo od grijeha, a srce ispuni pokornošću.

Mjesec ramazan, kao i uvijek, ponovo nam donosi svjetlost, njegovo dobro obasjava nam put, što će nas učiniti boljim ljudima, naše duše čistim, a ponašanje ljepšim.

Jedna od najvećih blagodati koje nam mjesec ramazan daruje i čemu uči svakog postača zasigurno je post. Štaviše, Poslanik, sallallahu alejhi ve sellem, nazvao je mjesec ramazan mjesecom strpljenja rekavši: "Postiti mjesec strpljenja i tri dana iz svakog drugog mjeseca jednako je postu cijele godine." (Ahmed) Posteći, čovjek sputava svoje strasti i prohtjeve, što iziskuje strpljenje, a čime se čini pokornost Allahu i djelo koje nas Njemu približava, čime se postiže Božija nagrada: "Post je moj. Ja za to nagrađujem!" A, možemo samo zamisliti kolika će to nagrada biti i koliko će Uzvišeni darovati postaču!





Dragi vjernici, vi što postite i noću klanjate! Strpljivost je početak svakog dobra, stub je vrijednosnog sistema i preduvjet je za jasno rezonovanje. To je osobina koja daje čovjeku snagu da nadvlada svoje strasti i da ne čini ružna djela.

Uzvišeni kaže: "O vjernici, budite strpljivi i izdržljivi, na granicama bdijte i Allaha se bojte, da biste postigli ono što želite!" (Ali Imran, 200)

Uzvišeni voli strpljivost kao osobinu i voli strpljive, i o tome kaže: "A Allah voli strpljive" (Ali Imran, 146).

Strpljivi osjećaju Božije sveprisustvo u svojim životima, jer ih On štiti i On vodi brigu o njima. Uzvišeni kaže: "Allah je, zaista, na strani strpljivih." (El-Enfal, 46) Poslanik, sallallahu alejhi ve sellem, kaže: "Ko se bude trudio da bude strpljiv, Allah će ga učiniti strpljivim. Najbolje i najobuhvatnije što je ikad ikome dato jeste strpljivost." (Buhari i Muslim)

Omer, radijallahu anhu, rekao je: "Svoje najbolje dane živjeli smo kada smo bili strpljivi."

Jedan od najboljih oblika strpljivosti jeste ustrajno činiti pokornosti i ustrajno se čuvati zabranjenih stvari. To je temelj vjere i odlika dobročinitelja. Uzvišeni kaže: "On je Gospodar nebesa i Zemlje i onoga što je između njih, zato se samo Njemu klanjaj i u tome budi strpljiv! Znaš li da ime Njegovo ima iko?" (Merjem, 65) Strpljivost podrazumijeva izdržljivo ustrajati u činjenju pokornosti, s iskrenom namjerom i na najpotpuniji način, kao i strpljivo se čuvati zabranjenih stvari, noseći strah od kazne u sebi i udaljavajući se od svakog uzroka koji odvodi ka grijesima.

Kada se vjernik strpi, u svome životu osjeti radost strpljivosti, biva upućen na ono što je najbolje za njega i ona mu osvjetljava njegov put. Njega čeka najveći uspjeh i pobjeda. Odabrani Poslanik, sallallahu alejhi ve sellem, kaže: "Strpljivost je svjetlo." (Muslim)

Poslanik, sallallahu alejhi ve sellem, rekao je Ibn Abbasu, radijallahu anhu: "Znaj da strpljivost uvijek donosi pobjedu." (Ahmed)





Strpljivost, također, donosi sveobuhvatnu nagradu i veliki sevap što daruje Plemeniti i Darežljivi Gospodar, kao što je spomenuto u Kur'anu: "Samo oni koji budu strpljivi bit će bez računa nagrađeni" (Ez-Zumer, 10); "I Džennetom i svilom ih za ono što su trpjeli nagraditi" (El-Insan, 12).

Šejhul-islam Ibn Tejmijja kaže: "Pošto strpljivost podrazumijeva ograničavanje sebe, gruboću, zamor i veliki umor – nagrada za to je Džennet, čija su prostranstva nepregledna, u kome se nosi nježna i mekana svila, a gdje se odmara naslanjanjem na divanima u hladu koji od vrućine štiti."

Upravo radi svega spomenutog u Kur'anu se potencira: "I ako budete strpljivi i Allaha se bojali, pa tako trebaju postupiti oni koji su jakom voljom obdareni." (Ali Imran, 186)

Poštovani vjernici, iskoristimo mjesec ramazan marljivim radom, jer će uskoro početi njegova posljednja trećina, odnosno posljednjih deset mubarek dana, koji su najbolji dani u njemu, u toj trećini je i Noć kadra, koja je bolja od hiljadu mjeseci. Uzvišeni kaže: "Meleki i Džibril, s dozvolom Gospodara svoga, spuštaju se u njoj zbog odluke svake." (El-Kadr, 4–5)

Poslanik, sallallahu alejhi ve sellem, u posljednjoj trećini ramazana više se trudio i ibadetio nego u drugim danima ramazana. Kada bi nastupila posljednja trećina, on ne bi intimno prilazio svojim suprugama, noći bi oživljavao ibadetom, i budio bi svoju porodicu kako bi i oni ibadeti. Radi toga, vrijedni vjernici, mi bismo također trebali raditi marljivo i dati sve od sebe. Neka Uzvišeni vidi da dajemo sve od sebe na putu dobra. Ovo je vrijeme kada se treba jako truditi i marljivo pripremati za Dan povratka Allahu. Neka se Allah smiluje čovjeku koji se probudio iz nemara i drijemeža, radeći sada za onaj svijet djela koja će mu biti od najveće koristi.

Neka su salavat i selam na poslanika Muhammeda, koji je kao milost svjetovima darovan. Neka su Božiji blagoslov i spas na njega, na njegovu časnu i čestitu porodicu, majke pravovjernih, četvericu pravednih halifa, na druge ashabe i na sve





one koji ih slijede u dobru do Sudnjeg dana. Uzvišeni, i nama se također smiluj. Ti si, uistinu, od plemenitih najplemenitiji.

Gospodaru naš, potpomogni vjeru i vjernicima pomози, brige zabrinutima ukloni, potrebe nevoljnicima ispuni, zaduženima dug isplati, bolesnima zdravlje podari. Ti si, uistinu, od milostivih najmilosniji.

Gospodaru naš, daruj nam snage da Te spominjemo, da Ti se na blagodatima zahvaljujemo i da Ti ibadet činimo. Gospodaru, primi od nas post i daruj nam najbolje konačište .

“Gospodaru naš, podaj nam dobro i na ovome i na onome svijetu, i sačuvaj nas patnje u Ognju!” (El-Bekara, 201)

“Veličanstven je Gospodar tvoj, Dostojanstveni, i daleko od onoga kako Ga predstavljaju oni! – i mir poslanicima i hvaljen neka je Allah, Gospodar svjetova!” (Es-Saffat, 180–182)

Znajte da vam je Allah naredio da donosite salavate i selame na Njegovog Vjerovjesnika, pa je rekao u mudroj Objavi: “Allah i meleki Njegovi blagosiljaju Vjerovjesnika. O vjernici, blagosiljajte ga i vi i šaljite mu pozdrav!” (El-Ahzab, 56)

Molim Allaha da i meni i vama podari blagoslov u časnom Kur'anu, i da podari da nam koriste njegovi ajeti i mudra opomena. Rekoh ovo i od Uzvišenog Allaha tražim oprost za sebe, za vas i sve muslimane od svakog grijeha, a tražite i vi, On mnogo prašta i On je milostiv.

